

मार्निंग डोगरी न्यूज़ बुलेटिन, समें. 09-20 Hrs

<><><><><><>

## Headlines

1. प्रधानमंत्री नरेन्द्र मोदी होरें कुल संसारी दक्खन टकोह्दे तौरा पर अफ्रीका दिएं चैताएं गी प्राथमिकता देने दा आह्वान कीता।
2. गृहमंत्री अमित शाह होरें जम्मू कश्मीर दी सुरक्षा स्थिति दी समीक्षा कीती। उनें 16 जून गी इक उच्ची सतह आली बैठक सददी।
3. भ्रष्टाविरोधी ब्यूरो नै जम्मू च मैहकमा माल, कस्टोडियन ते पुलस दे अफसरें कन्नै सरबंधत इक बड्डे जिमीं घोटाले दा पता लाया ऐ।
4. टी-20 क्रिकेट विश्व कप च भारत अज्ज फ्लोरिडा च ग्रुप स्टेज दे खीरले मैच च कनेडा कन्नै खेडोग।

<><><><><><>

## PM-G7 Summit

प्रधानमंत्री नरेन्द्र मोदी होरें “ग्लोबल साऊथ” दिएं चैताएं पर चेचा ध्यान देने दी जरूरतै पर जोर दित्ता ऐ, टकोह्दा करियै अफ्रीकी मुलखें दिएं समस्याएं ते चुनौतिएं पर। उनें टैक्नालोजी दे क्षेत्र च मोनोपली गी खत्म करने पर जोर दित्ता ते आखेआ जे इक समावेशी समाज दी नीह रखने लेई इसी रचनात्मक बनाया जाना लोड्चदा ऐ ते समाजी ना बरोबरी ते फर्कोफर्की गी भलेआ खत्म कीता जाना लोड्चदा ऐ। जी-7 दे आउटरीच सत्र गी संबोधत करदे होई श्री मोदी होरें आखेआ जे ग्लोबल साऊथ दे मुख्य दुनिया भरै च बनी दी यक्कोतक्की ते तनोतनी दा खमेयाजा भुगता करदे न। उनें आखेआ ते टैक्नालोजी गी रचनात्मक बनाया जाना लोड्चदा नां कि तबाही दा कारण। उनें आखेआ जे आर्टिफिशल इंटैलीजेंस गी साफ सुथरा, पारदर्शी, सुरक्षत, जिम्मेवार ते हर इक दी पुज्ज तोड़ी पजाने लेई भारत सब्बने गी सैहयोग देग। उनें आखेआ जे ऊर्जा दे क्षेत्र गी लेइयै भारत दा रौं 4 सिद्धांतें पर आधारित ऐ, जिंदे च चार “ए” शामिल न। पैहला अवेलेबिलिटी यानि दस्तेयाबी, दुआ आसेस्सेबिलिटी यानि पुज्ज, त्रिया अफोर्डेबिलिटी मतलब हर कुसै दी थवीक अंदर ते चौथा सिद्धांत ऐ एक्सेप्टेबिलिटी यानि सब्बने गी मंजूर।

<><><><><><>

Amit Shah

केन्द्री गृहमन्त्री अमित शाह होरें जम्मू संभाग दे रियासी जिले च तीर्थयात्रुएं गी लेइयै जा करदी बस पर कीते गेदे हमले सनें हाल च गै होई दिएं किश होर आतंकी घटनाएं मगरा केन्द्र शासत प्रदेश जम्मू कश्मीर च मजूदा हालात दी समीक्षा करने ताई कल इक उच्ची सतह आली बैठक सददी ऐ। बैठक च राश्ट्री सुरक्षा सलाहकार अजीत डोभाल, जम्मू कश्मीर दे उपराज्यपाल मनोज सिन्हा, सेना सीआरपीएफ दे आला अफसर ते होर बड्डे अफसर शामिल होई सकदे न। बैठक दरान आतंकी घटनाएं गी रोकने लेई पुट्टी गेदी गैई पर गल्लबात होई सकदी ऐ। समाचार अजेंसी पीटीआई नै दस्सेआ जे गृहमन्त्री होरें जम्मू कश्मीर च सुरक्षा स्थिति दी समीक्षा कीती ते अगड़ी कारवाई तैह करने आस्तै इक उच्ची सतह आली बैठक आयोजित करने दा फैसला लैता। ध्यानजोग ऐ जे एहदे शा पैहले प्रधानमन्त्री होरें इक बक्खरी बैठक च सुरक्षा अजेंसिएं गी आखेआ हा जे ओ केन्द्र शासत प्रदेश च आतंकवादिं ते उंदे समर्थकें खलाफ पूरी ताकत कन्नै कारवाई करन।

<><><><><><>

Searchers

छतरगल्ला ते गंदोह च हाल च होई दी आतंकवादी घटना मगरा फौज, पुलस ते नीम फौजी बलें आस्सेआ डोडा जिले दे बक्ख-बक्ख पहाड़ी इलाकें च लगातार तपाशी अभियान चलाया जा करदा ऐ। हाल च होई दी घटना च आतंकवादी 7एं सुरक्षाकर्मिएं गी घायल करने मगरा नस्सने च कामयाब होई गे हे। तोआई रियासी जिले च 9 जून गी इक यात्रुएं दी बस गी नशाना बनाइयै कीते गेदे हमले मगरा रियासी ते राजौरी जिलें दे तेरयय-कालाकोट बन्ने पर बी तपाशी अभियान तेज करी दित्ता गेआ ऐ। पुलस सूत्रेंद ा आखना ऐ जे डोडा जिले दे बक्ख-बक्ख हिस्से खास करियै जेहडे गंदोह ते छतरगल्ला गी जाने आले रस्ते न, तपाशी अभियान चलाया जा करदा ऐ। सूत्रें मताबक आतंकवादिएं दा इक जां दो ग्रुप होई सकदे न। मन्नेआ जा करदा ऐ जे एह पाकिस्तानी न। पुलस नै चरुं आतंकवादिएं दे पैहले गै स्कैच जारी कीते दे न ते इंदी जानकारी देने आले गी 20 लक्ख रपे दा इनाम देने दी घोषणा कीती गेदी ऐ। कटुआ दे हीरानगर सेक्टर च बी तपाशी आली कारवाई चला करदी ऐ। 11-12 जून गी होए दे हमले च इत्थें दरुं आतंकवादी मारे गे हे ते सीआरपीएफ दा इक जुआन शहीद होई गेआ हा। इस हमले च इक नागरिक जख्मी होई गेआ हा।

<><><><><><>

Div.Com

जम्मू दे डिवीजनल कमीशनर रमेश कुमार ते पुलस दे अतिरिक्त महानिदेशक आनंद जैन होरें श्री अमरनाथ जी दी यात्रा गी रमानदारी कन्नै करोआने बारे कल सिविल सोसायटी जम्मू दे मिंबरें कन्नै इक बैठक लाई। इस बैठक च जम्मू खित्ते च मजूदा हालात दे सरबंदे च गलत जानकारी कन्नै निबड़ने बारे बी सोच बचार कीता गोआ। बैठक च जम्मू दे डिवीजनल कमीशनर होरें श्री अमरनाथ जी यात्रा गी रमानदारी ते कामयाबी कन्नै करोआने लेई आम जनता ते सिविल समाज दी महत्वै आली भूमका दा जिक्र कीता। एडीजीपी होरें सिविल समाज दे मिंबरें कन्नै गल्लबात करदे होई एह अपील कती जे सिविल समाज दे मिंबर ते आम जनता कुसै सूचना पर उसले तोड़ी भरोसा नेई करे जिल्ले तोड़ी ओहदी अधिकारिक तौर पर तस्दीक नेई होई जंदी। बैठक च कारोबारिं गी अपनी दकानें ते धार्मिक ते परोपकारी संस्थानें गी अपने इदारें दे आले दुआले, सीसीटीवी कैमरें लोआने दी जरूरत पर जोर भरेआ गोआ। सिविल समाज दे लोकें सलाना यात्रा च पूरी चाल्ली साथ सैहयोग ते सहायता करने दी वचनबद्धता जाहर कीती।

<><><><><><>

Forex Reserve

7 जून गी खत्म होए दे हफ्ते च भारत दा विदेशी मुद्रा भंडार 4 अरब 307 करोड़ डॉलर बधियै अपने सब्बने शा उच्चे स्तर 655 अरब 817 करोड़ डॉलर होई गोआ ऐ। एहदे शा पैहले हफ्ते च मुद्रा भंडार 4 अरब 837 करोड़ डॉलर बधियै 651 अरब 51 करोड़ डॉलर होई गोआ हा। मुद्रा भंडार च पिछला सब्बने शा उच्चा स्तर 10 मई गी 648 अरब 87 करोड़ डॉलर हा। विदेशी मुद्रा भंडार च पिछले किश हफ्तें च शैल बाद्धा दर्ज कीता गोआ ऐ।

<><><><><><>

My Gov. Oortal

मुख्य सचिव अटल डुल्लू होरें My Gov. पोर्टल <https://jk.mygov.in> पर जम्मू कश्मीर दे बसनीकें ताई 21 जून गी मनाए जाने आले 10में अंतर्राष्ट्रीय योग दिवस समारोह दे उपलक्ष्य च कल नेकें ऑनलाइन मकाबले शुरू करोआए। योगा फॉर सैल्फ एंड सोसायटी यानि अपने ते समाज आस्तै योग सिरलेख पर आधारित मकाबलें च योग डूडल चैलेंजनिबंध लिखना ते पोस्टर बनाने सनें, कहानी सनान आले वीडियो मकाबले शामिल हे। एह मकाबले J&K My Gov. पोर्टल पर लाइव उपलब्ध न ते एहदे लेई पंजीकरण 30 जून 2024 तगर खुले दा रौहग। मकाबले च पैहली थार हासल करने आलें गी 10 जहार, दूई थाहर आले गी 8 जहार ते त्री थाहरे पर औने आलें गी 5 जहार रपे दा नकद ईनाम दित्ता जाग। मकाबलें च हिस्सा लैने आले My Gov. पोर्टल पर अपना पंजीकरण करोआइयै एहदे च शामिल होई सकदे न।

<><><><><><>

ACB

भ्रष्टाचार विरोधी ब्यूरो एसीबी नै जम्मू च इक जिमीं घोटाले दा पर्दा-फाश कीता ऐ। इस घोटाले च किश सरकारी अफसरें दी मिली भगत कन्नै भू-माफिया आस्सेआ हड़पी गेदी 28 एकड़ शा बद्ध जिमीं शामिल ऐ। जांच अजेंसी नै सरकारी अधिकारिएं सनें 5 एफआईआर दर्ज कीतियां न ते घोटाले च कथित तौरा पर शामिल कारोबारिएं खलाफ छापेमारी बी कीती गई ऐ। कल पत्रकारें गी संबोधत करदे होई एसीबी जम्मू दे डीआईजी विकास गुप्ता होरें दस्सेआ जे मामले दी शुरूआती जांच थमां पता लग्गा ऐ जे जम्मू जिले दे असरवां, मिश्रीवाला ते भलवाल इलाके च 225 कनाल कस्टोडियन जिमीं गी भू-माफिया ने कस्टोडियन, राजस्व ते पुलस मैहकमे दे अधिकारिएं दी मिलीभगत कन्नै हड़पी लैता। श्री गुप्ता होरें दस्सेआ जे अजें तोड़ी तैहसीलदार, नायब तैहसीलदार ते पटवारिएं सनें 8 शा 10 सेवारत ते रटैर होई चुके दे मैहकमा माल दे अफसरें गी एफआईआर च नामजद कीता ऐ ते मामले दी अगली जांच जारी ऐ।

<><><><><><>

LG-Kheer Bhawani

जेष्ठ अष्टमी दे पवित्र मौके पर जम्मू कश्मीर दे उपराज्यपाल मनोज सिन्हा होरें कल गांदरबल जिले दी तुलमुला थाहर माता क्षीर भवानी मंदर च यात्री भवन दा नीह पत्थर रखेआ। उपराज्यपाल होरें माता क्षीर भवानी हुंदे अगो मत्था टेकेआ ते अमन शांति, खुशहाली ते सब्बने दे नरोएपन दी कामना कीती। उनें श्रद्धालुएं कन्नै गल्लबात कीती ते पवित्र मौके पर उनेंगी ममारखां दित्तियां। उपराज्यपाल होरें समाचार माध्यमें कन्नै गल्लबात करदे होई माता क्षीर भवानी दे श्रद्धालुएं लेई सहूलतें च बाद्धा करने दे प्रशासन दे धेइयै गी दोहराया। उनें आखेआ जे यात्री भवन दा निर्माण 3 करोड़ 85 लक्ख रुपें दी लागत कन्नै कीता जाग। एह्दे कन्नै श्रद्धालुएं गी ना शड़ा अरामदायक यात्रा दा एहसास होग सगुआं इत्थें साफ सफाई दी सहूलतें च बी बाद्धा होग। उनें मेद प्रकट कीती जे अगले 8एं म्हीने च इस भवन दा निर्माण होई जाग।

<><><><><><>

Rajinder Singh(byte)

कश्मीर दे रक्षक खेआए जाने आले महावीर चक्र विजेता ब्रिगेडियर राजिन्द्र सिंह हुंदा 125मां जन्म ध्याड़ा कल उंदे जददी ग्रं राजिन्द्र पुरा बगूना जिला सांबा च मनाया गेआ। जम्मू कश्मीर एक्स सर्विसमैन लीग ते सांबा जिला प्रशासन दे सैह्योग कन्नै आयोजित इस कार्यक्रम च डीसी सांबा अभिषेक शर्मा होर बतौर मुख परौहने

उत्थें मजूद हे, कार्यक्रम च ब्रिगेडियर राजिन्द्र सिंह जी हुंदे परोआर दे मिंबरें ते मन्ने परमन्ने दे लोकें शिरकत कीती। ध्यानजोग ऐ जे 14 जून 1899 च बगूना च जन्मे दे ब्रिगेडियर राजिन्द्र सिंह होरें 26–27 अक्टूबर 1947 च कश्मीर दे उड़ी सेक्टर दी बुनियार थाहर पाकिस्तानी कवालियें कन्नै लोहा लेंदे होई शहीद होई गे हे। उनेंगी अदू थमां गै कश्मीर दे रक्षकै दे नां कन्ने जानेआ जंदा ऐ। इस मौके बोलदे होई सांबा दे डीसी अभिषेक शर्मा ते लैफ्टिनेंट जनरल जम्मू कश्मीर एक्स सर्विसमैन लीग राकेश शर्मा होरें आक्खेआ.....  
बाईट

<><><><><><>

## Cricket

आईसीसी मर्दे दे टी-20 क्रिकेट विश्व कप च आयरलैंड खलाफ ग्रुप ए दा मळतवै आला मैच कल लगातार बरा'रदी बरखा करियै रद्द होने कारण यूएसए सुपर-8 च पुज्जी गेआ ऐ। एह पैहला मौका ऐ जे यूएसए अपने क्रिकेट इतिहास च इस गेड च पुज्जा ऐ। यूएसए ग्रुप ए थमां अगले गेड च पुज्जने आली भारत परेंत दूई टीम बनी गई ऐ। साबका चैंपियन पाकिस्तान ते आयरलैंड सुपर-8 दी द्रौड थमां बाहर होई गे न। भारत अज्ज फ्लोरिडा दे सेंट्रल ब्रावोड पार्क स्टेडियम च ग्रुप दे अपने खीरले मैच च कनाडा कन्नै खेड्डग। मैच भारती समें मताबक रातीं 8 बजे शुरू होग।

<><><><><><>